

PEMBERITAHUAN PERTANYAAN LISAN DEWAN NEGARA
MESYUARAT KEDUA PENGGAL PERTAMA
PARLIMEN KEEMPAT BELAS

PERTANYAAN : LISAN
DARIPADA : YB SENATOR TUAN HAJI MUHAMAD BIN MUSTAFA
TARIKH : 19 DISEMBER 2018 (RABU)

SOALAN NO. 1

YB Senator Tuan Haji Muhamad Bin Mustafa minta **MENTERI PEMBANGUNAN WANITA, KELUARGA DAN MASYARAKAT** menyatakan apakah usaha Kerajaan dalam menyelesaikan dilema ibu bekerja yang menghadapi masalah untuk menghantar anak ke pusat asuhan yang selamat.

JAWAPAN

Tuan Yang di-Pertua,

Kementerian melalui Jabatan Kebajikan Masyarakat Malaysia (JKM) telah diberi tanggungjawab menguatkuasakan Akta Taman Asuhan Kanak-Kanak 1984 dan Peraturan-Peraturan Taman Asuhan Kanak-Kanak 2011. Setiap pengusaha Taman Asuhan Kanak-Kanak (TASKA) hendaklah mematuhi keperluan dan kehendak yang dinyatakan di dalam peraturan yang telah ditetapkan.

Bagi memastikan tahap penyampaian perkhidmatan Taman Asuhan Kanak-Kanak yang dikendalikan oleh pengusaha berada di tahap keselamatan yang tinggi, Kementerian melalui JKM juga menjalankan pemantauan ke TASKA berkaitan. Di antara bentuk pemantauan yang dijalankan ialah:

- i. Mengesan TASKA tidak berdaftar secara berterusan;
- ii. Menjalankan pemeriksaan berkala dan mengejut ke TASKA oleh Pegawai Diberikuasa;
- iii. JKM membimbing pengasuh dan memberi maklumat tentang Kursus Asuhan PERMATA dan program/seminar/taklimat berkaitan pengasuhan dan pendidikan awal kanak-kanak melalui 42 buah agensi latihan yang telah diiktiraf oleh JKM;
- iv. JKM juga mengadakan pelbagai program untuk meningkatkan kesedaran masyarakat dan ibu bapa tentang kepentingan dan kelebihan menghantar anak ke TASKA yang berdaftar dengan JKM. Baru-baru ini juga Kementerian telah pun melancarkan info grafik bagi membimbing ibu bapa mengenai pemilihan pengasuh; dan
- v. Satu Bengkel Pindaan Akta Taman Asuhan Kanak-kanak [Akta 308] telah diadakan pada 11 Julai 2018 bagi memantapkan kawal selia TASKA di seluruh Malaysia.

Manakala untuk tindakan penguatkuasaan yang telah di ambil dari tahun 2014 sehingga Jun 2018, JKM telah mengeluarkan Arahan Bertulis kepada **123** buah TASKA, tindakan lak kepada **24** buah TASKA, **62** buah TASKA dikenakan tindakan kompaun, **11** buah TASKA di tutup

SOALAN NO. 1

sementara, **235** buah TASKA dibatalkan pendaftaran, dan **28** buah TASKA telah didakwa.

Semua agensi kerajaan telah diwajibkan untuk menubuhkan TASKA menjelang 1 Januari 2019. Oleh itu, JKM telah menubuhkan pasukan Task Force di kalangan Pegawai Diberi Kuasa TASKA (PDBK) bagi membuat audit dan memberikan khidmat nasihat teknikal kepada semua agensi kerajaan bagi memastikan TASKA di tempat kerja disediakan, terutamanya yang mempunyai waktu syif. Hasil daripada pengauditan tersebut didapati masih terdapat tiga (3) Kementerian yang belum menubuhkan TASKA iaitu Kementerian Air, Tanah dan Sumber Asli, Kementerian Tenaga Sains, Teknologi, Alam Sekitar dan Perubahan Iklim, dan Kementerian Hal Ehwal Ekonomi.

Melalui peruntukan Bajet 2019 Kementerian ini diberi tanggungjawab menguruskan peruntukan **RM10 juta** yang disediakan kepada **50** buah TASKA di bangunan kerajaan bagi menggalakkan penubuhan TASKA di Tempat Kerja sektor awam. Dengan peruntukan ini, TASKA di tempat kerja akan bertambah dan menambahkan kapasiti kanak-kanak di TASKA di Tempat Kerja yang boleh mengurangkan kerisauan ibu bapa untuk menghantar anak-anak ke TASKA.

Bagi tujuan ini, Kementerian telah melaksanakan beberapa langkah dan inisiatif baru dalam menggalakkan majikan menyediakan Taman Asuhan Kanak-kanak (TASKA) di Tempat Kerja sektor awam dan swasta.

Kementerian ini juga menggalakkan sektor swasta untuk bersama-sama mewujudkan TASKA di tempat kerja khususnya kepada badan korporat dan turut melaksanakan tanggungjawab sosial (CSR) untuk memberi peluang kepada golongan B40 yang bekerja berhampiran untuk menghantar anak ke TASKA tersebut. Kementerian ini masih sedang membincang dengan syarikat utiliti untuk mengurangkan kadar tarif bagi kos operasi TASKA.

Sebagai kesimpulan, Task Force audit pemutihan di Putrajaya masih sedang dilaksanakan dan hasilnya nanti akan dijadikan rujukan untuk dilaksanakan di seluruh negara.